

ACD Val Badia - SSV Percha

Inviato da Jonas
Ultimo aggiornamento domenica 25 agosto 2024

Sabda, 07. otober 2023

La fortuna ne á nia daidé

N sabeda domisdé dales 15:30 él gnü soghé la partida de campionat de 3^a categoria danter l' ACD Val Badia y l' SC Percha sön l' ciamp "Pradel" da San Martin. I ladins á soghé mal, la fortuna ne á nia daidé y dailo ne pon gnanca se aspeté n bel resultat.

La partida mèt man y al 10^a pon odèi la pröma ocasiun dla partida che porta incé al pröm gol. N atacant da Percha röva te area cun l' palé sön l' pé, é sú dan Ferdigg y cun na bela trata portl süa squadra sön l' 0-1. Al 13^a él indo l' indemo sogadú che ciafa l' palé al limit dl' area ladina, l' mèt jö y lascia pié ia na bela trata bassa che vá tl' ciantun de porta por l' 0-2. Al 26^a á l' Percha indô na ocasiun cun na bela trata a püc metri da porta, mo chësc iade é Ferdigg asvelt y para cun n gran intervënt. N menüt dedô ciafá l' Percha na trata dal ciantun. La trata röva te area olaché n sogadú todësch tira de cé y l' palé vá a sbaté sön la traversa. Sön chëra prô l' Percha ciamó na trata de rebatöda, mo chësta vá a sbaté sön la defenjiun ladina. Al 42^a se porta i ghes sön l' 0-3 cun n "eurogol". N sogadú lasciá pié ia na grandiscima trata da 30 metri de distanza che röva tl' ciantun alt de porta y ti lascia degöna poscibilité a Ferdigg. N beliscimo gol. Al 45^a dá l' arbiter ciamó 4 menüc de recuper y al 49^a sciürl spo la fin dl' pröm tēmp sön l' resultat de 3-0 por l' Percha.

La pröma aziun dl' secundo tēmp pó le publich odèi al 55^a canché Verginer ciafá l' palé, pëia ia cuntra porta y lascia spo pié ia na bela trata che vëgn parada dal portier aversar. Al 69^a és la Val Badia la poscibilité da fá almanco n gol dô che l' arbiter a sciuré na trata da önesc metri por i ladins dô n fal sön Valentini. Pizzinini se tol sö l' inciaria da le trá mo la trata é debba y l' portier para. Al 74^a prô Valentini na bela trata da dalunc olaché l' portier di ghes mëss se impegné por la paré te ciantun. 2 menüc dedô á Valentini ciamó na ocasiun cun na beliscima trata de puniziun che vá sura la bariera fora y vá a sbaté sön la traversa dan co jí fora de campo. Ala Val Badia ti mancel n püch de fortuna. Al 78^a él spo la Val Badia che fej n fal te area sön n sogadú aversar y l' arbiter sciüra na trata dai önesc metri. L' sogadú pëia ia y cun na gran trata sot la traversa portl süa squadra sön l' 0-4 definitiv. Dô chësta aziun ne sozedl nia plü tröp y insciö él l' arbiter che sciüra la fin dla partida al 93^a, dô 3 menüc de recuper. Na partida olaché la Val Badia ne á nia albü tröpes ocajions y canché ai á albü val ocajion al dër mancé la fortuna. A Ploner Matteo ti aodunse na guarijun asvelta dô che al se á fat mé al cé tratan la partida.

ACD Val Badia - SSV Percha: 0 - 4

Formaziun ACD Val Badia: 1. Ferdigg Rene, 2. Miribung Alex, 3. Ploner Matteo (dal 7^a 19. Piazza Armin), 4. Graffonara Simon, 5. Clara Fabian, 6. Videsott Max, 7. Bernardi Luca (dal 43^a 14. Unterweger Joel), 8. Dallapiazza Simone (dal 46^a 15. Crepaz Luca), 9. Verginer Thomas (dal 80^a 18. Costner Andre), 10. Valentini Luca, 11. Pizzinini Luca (dal 71^a 16. Pramstaller Lukas).

Alenadú: Graffonara Hanspeter.

Proscima partida: La proscima partida vëgn sogada n sabeda, ai 14 de otober, dales 15:30 cuntra l' ASV Uttenheim sön l' ciamp dal palé da Uttenheim.